

Lihamba lya ulongohi kwa Petili Ulongolelo

Lihamba lya ulongohi lya Petili likityekwa na ndumila Petili. Petili kangutyeka lihamba lyake kwa kulikambuha ywombe kukita ndo ghani na kanguatyekela akina ghani. Lihamba lyake kanguatyekela bhandu bhoha bhaanhyubhalila Kilisito bhene ndo “handa ahenja mu nnima aghu” Nlyango ghwa 1:1. Kwa utangalo kakiakema habhu bhakaatyekelite handa ahenja. Kiyaha mu himoo hipalamande lihamba ali lingulihwana na lihamba lya Paulo kwa Akaaefeso, bhandu atangalo bhanguhyubhalila kukita lihamba lya ulongohi lya Petili likityekwa mbole ya lihamba lya Paulo kwa Akaaefeso mu handa ngungwa ya mbinda mabhoko sita na nhano mbole ya kubhelekwa kwa Kilisito. Petili kakilityeka lihamba ali pakabheghite ku Loma kweni Kitami kiikemitwe Babeli. Nlyango ghwa 5:13.

Petili kangulubhulila kukita kakityekya lihamba ali kwa likaho lya “kutuyonjokeha mwoyo na kuyimiha kukita alu ndo luhungu lwa hoto lwa Chapanga” Nlyango ghwa 5:12. Kuna milando mitangalo yiilihwana nkanti ya lihamba lya ulongohi lya Petili. Nlyango ghwa 2:11—3:7 na Akaaefeso. Nlyango ghwa 5:18—6:9, na ghala ghaatyekitwe mu Akaakolosai. Nlyango ghwa 3:18—4:6. Malubhulilo ghoha ghaalubhulilitwe mu hipalamande hindatu ghangulinga ya kya

umonga mu lubhagha na kughuyitikila utabhala. Kangi kanguayonjokeha myoyo bhaanhyubhalila Kilisito kulimbilila pala paakindila himbamanda kiyaha uhiko ghuheghelela. Nlyango ghwa 4:1.

Ghaabheghite

Petili kangulimanyiha ywombe na kubhakambukiha bhala bhakabhatyekilite. Nlyango ghwa 1:1-2.

Mbole kangunnumba Chapanga kwa kya ulopoho bhaaghulilunga na kya bhula ghuubheghite ghwa utopelo kwa ubhumi ghwabhe. Nlyango ghwa 1:3—2:10.

Mbole Petili kangualaghila kya bhuli yinguanogha bhaanhyubhalila Kilisito kutama mu nnima aghu na kangubhoneha humoo umonga handa bhula ghwa nnume na nndala ghwake na ghula ghwa nbhandwa na nngwana ghwake. Nlyango ghwa 2:11—4:11.

Petili kanguayonjokeha mwoyo kulimbilila paabhegha mu kimbamanda. Nlyango ghwa 4:12—5:11.

Mbole Petili kanguyomola lihamba lyake. Nlyango ghwa 5:12-14.

¹ Lihamba ali linguhuma kwa nenga Petili, nndumila ghwa Yesu Kilisito.

Nungubhatyekela mwenga alingwa bha Tate Chapanga, bheni munpwilinganite na mungutama handa ahenja akwo ku Ponto, na ku Galatia, na ku Kapodokia, ku Asia na ku Bisinia.

² Ywombe kabhalinga mwenga kulandana na likaho lyaki na mmeghe bha kya mwene kwa

Nhuki, mmokole kunnyitikila Yesu Kilisito na kuyohwa kwa mwahi ghweke.

Nungubhayupila umaha na uhihimilo ghwa Chapanga ghubheghe ngenju kwa mwenga.

Udumbilo ghuubheghite na ubhumi

³ Katikilwe Chapanga na Tate ghwa Bambo ghwetu Yesu Kilisito kwa luhungu lwake lukulu kakitutenda tubhelekwe uhyono kwa kunhyuha Yesu Kilisito kuhuma kwa bhaahweghite, kakitenda habhu ngati tubheghe na lidumbilo liibhegheghite na ubhumi,

⁴ na habhu tungulindila nonelo yene Chapanga katubhikila bhandu bhake kunani. Ghwene kahone kubhola, ebu kuhanjanika ebu kumbughala.

⁵ Nonelo ahyo ndo hya mwenga kwa njila ya kuhyubhalila mungukingikihwa maha kwa makakala gha Chapanga mbaka paghuhika ghula ulopohi ghuupala kuhwimulighwa mu ndaluko ghwa uhiko.

⁶ Ali linguatenda nnyelelwe munu, hata payibhele hinu munguhyononeka kwa manjubha gha mandina kwa maghayo na himbamanda nhanganganiko.

⁷ Himbamanda ahyo hingubhahikila ngati uhyubhalilo ghweni ghungung'ehwa ngati kuyimiha kukita ndo ya hoto, agha ghangulandana na lihabha pala paliyochwa mu mwoto hata palipela ngati yibheghe nglii. Habhu uhyubhalilo ghubhegha na utopa kupitingana lihabha, pala kuhyubhalila kwenu paghuyimihwa kukita ndo kwa hoto, maakamuhwa litiko, na ukulu, na

uhokamo mu ndaluko ghwa kuhwimulighwa kwake Yesu Kilisito.

⁸ Mwenga mungunpala hata payibhele munammona ng'obhe, na mungunhyubhalila hata payibhele mungunmona ng'obhe hinu. Habhu munguyelelwa kwa uyelelo ghuubheghe na Ukulu ghwangahotoleka kulubhulilwa,

⁹ kiyaha mungukingama ulopohi ghwa myoyo yenu, ghwene ndo likaho lya kuhyubhalila kwenu.

¹⁰ Kwa kya ulopohi aghwo mambuye bha Chapanga bhakipalaha na kuhingukiha, na bhakilondola kwa kya umaha aghwo ghene ywombe kangabhapeghe.

¹¹ Mambuye abho bhakiyigha kughumanya ndaluko ghwoki na kya bhuli payipala kutulukila. Nhuki ghwa Kilisito ywene ywakabheghe nkanti yabhe kakilangiha na kakilondola kukita Kilisito katapamandika na ukulu ghula ghuupala kuhika.

¹² Chapanga kakibhahwimilila mambuye abho kukita milando yaayilondolite yikibhatangatila ng'obhe bhombe ngati kwa kya mwenga. Na hinu nnyihwa milando ayi kuhuma kwa bhala bhaabhalandamihite Nhalo ghwa Maha kwa makakala gha Nhuki ghwa Chapanga ywakalaghitwe kuhuma kunane. Milando ayi hata andumitumi bha kunane kwa Chapanga bhakipala kuyimanya.

Lukemo lwa kutama matamo kwa kya Chapanga

¹³ Kya habhu, mulibhike kala mahala gheni ghabheghe kala kwa lihengo. Mulindakile na

tama hya nga kunnogheha Chapanga na mmike udumbilo ghweni kyanalumu mu umaha ghweni ghwaagheghwa kwa mwenga, pala Yesu Kilisito pakahwimulighwa.

¹⁴ Handa bhana bha Chapanga bhaabheghite na uyitikilo, nkotoke kuyitikila katakata kutughila kangi malema ghenu mahakataho handa bhula pammeghite kya nga kughumanya uhoto ghwa Chapanga.

¹⁵ Ngati mungunoghwa kubhegha bha kya Chapanga mu ng'endelo yenu yoha, handa bhula pakabhele yula ywakabhakemite.

¹⁶ Matyeko ghangulongela, "Mmeghe bhaabhaghulitwe kwa kya Chapanga handa paamele nenga."

¹⁷ Chapanga yumunkema tate mumayupo ghenu. Hino, mmanye kukita ywombe kanguntosa kila mundu kulandana na kyakakitendite, kya nga ubhaghulo. Kya habhu ntame maha muntundamile Chapanga manjubha ghenu ghakutama apa pannima handa ahenja.

¹⁸ Kiyaha mungumanya kukita mwenga mukikomboleghwa kubhukana na ng'endelo yenu hakataho yene mukihala kuhuma kwa aghohi bhenu. Peni mukikomboleghwa, chepa kubhukana na hilibhi kuhanjanika, handa bhula kwa maganga gha utopelo ghaakemwa feza na mahabha,

¹⁹ ngati kwa mwahi ghwa nyambi ya matulo gha Kilisito, ywene kakibhenga handa mwanamene ywa maha ebu ywanga utebhalo.

²⁰ Ywombe kakilingwa na Chapanga kukali

na kubhumbwa kwa unnima, kakihwimulighwa kwa kya mwenga manjubha agha gha uhiko.

²¹ Kwa kukindila ywombe, mungunhyubhalila Chapanga ywakanhyuhite kuhuma kwa bhaahweghite kampeghe ukulu, habhu uhyubhalilo na udumbilo ghweni ghubheghe kwa Chapanga.

²² Kiyaha hinu mughuyitikila uhoto, mwenga muiyoha myoyo yenu ngati mubhapale ayenu kyanga ufyangu, kya habhu mulipale mabhene kwa mabhene kwa myoyo ghwoha.

²³ Kiyaha kwa kukindila lilagho linakulama lya Chapanga, mwenga mmelekwa uhyono, chepa handa bhana bha tate ywakahwegha, ngati tate yunakulama manjubha ghoha.

²⁴ Handa matyeko paghalongela.
“Anabhandu bhoha bhabheghe handa manyahi, na ukulu ghwabhe ghwoha ghubheghe handa ulubha ghwa kuluchi.

Manyahi ghangunyaluka na malubha ghangupolota.

²⁵ Peni lilagho lya Bambo lingulama manjubha ghoha.”

Na lilagho alyo ndo aghwo Nhalo ghwa Maha ghuulandamahitwe kwa mwenga.

2

Liganga linaubhumi na nnima ghwa kya Chapanga

¹ Hino, mughuleke uhokelo ghwoha, uhwangi, ufyangu, na tama hakataho, na malagho gha kukokela bhulwa.

² Handa bhula bhana hing'enya pabhapala kuyonga mabhele, na mwenga mmeghe na

kilyakalyaka kya mabhele gha hoto gha nhuki
ngati libhatangatile kukula mu ulopohi,

³ handa hoto npaha na kangi nng'amula kukita
Bambo ndo ywa maha.

⁴ Hino, nhike kwa nenga, ndo liganga linaku-
lama liilemelitwe na anabhandu, peni liilingitwe
na Chapanga na kangi ndo liganga linautopelo
kwa ywombe.

⁵ Mwenga bhubho handa maganga ghanaku-
lama nchengwa kwa kitutubhi kya kiuhuki,
panng'egha nyambi ya kinhuki yina kunnyelesa
Chapanga kukindila Yesu Kilisito.

⁶ Kiyaha matyeko gha Chapanga ghangulong-
gela,
“Nnole, nungulikimika liganga akwo Sayuni,
liganga lya kitamiko, nililingite na lya utopelo.
Mundu ywohele ywakanhyubhalila aywo
kaayuyuhwa kata.”

⁷ Kwa mwenga munakuhyubhalila, liganga alyo
ndo lya utopelo nkulu, peni kwa bhala bhanga
kuhyubhalila,

“Liganga lyaalilemite atendehe,
hinu libhega liganga likulu lya kitamiko.”

⁸ Matyeko ghangulongela kangi.

“Liganga alyo ndo liganga lya kulikubhala,
litalabha lya kuaghwiha bhandu.”
Bhandu bhangulikubhala kiyaha bhangulihyub-
halila ng'obhe alyo lilagho, handa palibhele
likaho kutandila kalongohi.

⁹ Peni mwenga ndo kibheleko kiilingitwe,
mandundame bha Kibhutwa, nnima ghwa kya
Chapanga, bhandu bhake mwene Chapanga,
munningitwe kulandamiha milando mikulu ya

Chapanga ywakaakemite kuhuma kulubhindu, nnyingile kuulangalo ghwake ghwa kukangahya.

¹⁰ Kalongohi mwenga mukibhegha ng'obhe bhandu bha Chapanga, peni hinu mwenga mmegha bhandu bhake, makachu ghala mukikamuhwa ng'obhe lipyanda lya Chapanga, peni hinu nkingama lipyanda.

Andumitumi bha Chapanga

¹¹ Maaghanja bhangu, nunguasigha handa ahenja na apitanjila bha apa pannima! Nnekane na tama hakataho hya mmili, hyene highulimbana na mihuki yenu.

¹² Mmeghe na ng'endelo ya maha muulongolo ghwa bhandu bhanga kummanya Chapanga, ngati handa paabhakupukiha kukita mwenga mungutenda mahakata, bhahotole kung'amula milando yenu ya maha na habhu bhantike Chapanga pakapala kuhika.

¹³ Kya habhu munnyitikile kilongohi ywohele ywakabhikitwe na anabhandu: Yibhe ndo kwa mutwa nkulu muno,

¹⁴ ebu ya hilogohi bhangi bhaaalingwitwe naywo ngati bhabhakehe bhala bhaatende uhokelo na kubhatika bhala bhaatendite makataho.

¹⁵ Mana Chapanga kangupala nhotole kubhahibha milomo malagho gha bhandu abhughabhugha.

¹⁶ Kiyaha mwenga ndo mabhopwa ng'obhe, nkotoke kughutumila ghwangabhopwa ghweni handa kikupukiho kya kutenda ulemwa, ngati

ntame handa payibhanogha andumitumi ghwa Chapanga.

¹⁷ Mubhahokamile bhandu bhoha, muapale alongo bhenu anhyubhalilo, muntundamile Chapanga, na munhokamile mutwa.

Kughutughila nhwano ghwa kupamandika kwa Yesu

¹⁸ Mwenga maandumindumi, mubhayitikile mabambo bhenu kwa uhokamo ghwoha, paabhele bha umaha ebu atama nuu ebu hata paabhele akalipa.

¹⁹ Kiyaha ndo nnando ghwa kuyelehwa handa mundu kaalimbilila pakapamandwa kwa kubhonetwa, Chapanga kanguyelelwa

²⁰ Kiyaha maamokola lilumbo ghani panlimbilila matuto ghamughanoghwa kubhukana na uhokelo ghwenu? Peni handa maalimbilila himbamanda hata payibhele ntenda gha maha, Chapanga katabhanonela kwa kya agho.

²¹ Kiyaha mwenga nkemwa kwa kya ali, mana Kilisito kakipamandwa kwa kya mwenga, kangi kakialekela nhwano, ngati ntende handa pakatendite ywombe.

²² Ywombe kakitenda ng'obhe ulemwa, hangi kulongela lilagho lya uhwangi mu ngulo yake likiyihwanika ng'obhe.

²³ Pabhanlighite ywombe kakiyanga ng'obhe kwa liligho, paaghendelelite kumpamanda ywombe kakibhayoghoha ng'obhe, ngati kakibhika udumbilo ghwake kwa Chapanga, nndumula nongwa ghwa nga ubhaghulo.

²⁴ Ywombe kakighutola ulemwa ghwetu mu mmili ghwake, kunani mwa lupingika lwa nkongo, ngati tuhweghe kwa milando ya ulemwa ngati tulame kwa kutenda gha maha muulongolo ghwa Chapanga, kwa hilonda hyake mwenga nlamihwa.

²⁵ Mwenga mukibhegha handa mene bhaahobhite, peni hinu mummuyila nhakila na nkingik-
iha ghwa mihuki yenu.

3

Ahumbu na alume bhabhe

¹ Ubhwabhu abhu mwenga maahumbu, mubhayitikile alume bhenu, kwa njila ayi alume bhenu bhanga kunhyubhalila Chapanga paabhona ng'endelo na uhokamo ghwenuyakya Chapanga, bhaahyubhalila na kunnyitikila Chapanga kya nga kubhaghombela lilagho lyohela,

² kiyaha paabhona ng'endelo yenu yilandana na bhandu bhaahaaghulitwe na Chapanga kubhukana na uhokamo ghweni.

³ Kulilemba kwa mwenga kukotoke kubhegha kwa panje ghweka, handa bhula madolido gha kupota hwili, na kuhwala malembo gha mahabha na mapinda gha kung'anyima,

⁴ kihyengo kyake kulilemba kwa mwenga kubheghe kwa nkati ghwa umaha ghwa nga kupela, ghwene ndo, nhuki ghwa unuu ghwa mwoyo aghwo ndo ghunautopelo nkulu muulongolo ghwa Chapanga.

⁵ Habhu ndo pabhalilembite ahumbu bha makachu bhaabhaghulitwe kwa kya Chapanga.

Bhene bhakinhyubhalila Chapanga na kuayihwa alume bhabhe.

⁶ Handa Sala pakannyitikilite nnume ghwake Abulahamu na kakinkema bambo. Mwenga ndo bhana bha Sala handa pantenda ghabheghite gha maha na gha nga kuyoghopa na nnando ghwoheli.

⁷ Ubhwabhuabhu mwenga maalume, ntame na ahumbu bhenu kwa njila ya malango pamanya kukita bhombe ndo ayoyobhalo kupitigana mwenga na kya habhu mubhatendele uhokamo. Mana nabho bhubho bhaakingama lilumbo lya ulami papamu na mwenga lyakapala kubhapegha Chapanga. Ntende habhu ngati mayupo gheni ghakotoke kukanikihwa na kilibhi kyoheli.

Kimbamanda kwa kya kutenda gha maha

⁸ Kuuhiko nunguaghombela naha, mabhoha yingubhanogha kubhegha na mwoyo ghumo, na kutendelena lipyanda na mahwacho ghomo, na kupalana kiulongo, na kutendelana umaha na utekulo.

⁹ Nkotoke kuabhuyiha mahakata kwa mahakata ebu liligho kwa liligho, peni mubhapalile unonelo, mana mwenga mukikemwa na Chapanga mmokole kusingama unonelo.

¹⁰ Handa paghalongela matyeko gha Chapanga, “Handa mundu kangupala ulami, na kubhona manjubha gha kuhalala, kangunnoghwa kuukanikiha lulimi lwake kulongela mahakataho na milomo yake kulongela uhwangi.

11 Kangunoghwa kaghuleke uhakata na kaghutende umaha

Kangunoghwa kaghupalahe uhihimilo na kugh-
endelela kutama mu uhihimilo.

12 Kiyaha meho gha Chapanga ghangub-
halolekeha kwa umaha bhaannyitikila
na makutu ghake ghanguyihwa mayupo ghabhe,
peni kangubhapingika bhandu bhaatenda
uhokelo.”

13 Hino ndo ghani ywakahotola kubhatendela
mihakataho mwenga handa pankakalika ku-
tenda umaha?

14 Peni hata payibhele yingubhanogha kimba-
manda kubhukana na kutenda umaha, Chapanga
katabhanonela mwenga, nkotoke kuyoghopa na
kuloghoya.

15 Peni muntike Kilisito mummyoyo yenu kukita
ndo Bambo. Mmeghe kala manjubha ghoha kun-
nyanga mundu ywohele ywakaapala kubhakonya
kwa kya mahyubhalilo yibheghite mu myoyo
yenu,

16 peni ntende habhu kwa utama nuu na
uhokamo. Mmeghe na mahwachu gha maha
ngati bhala ghaanng'ombela mahakata bhab-
hone honi.

17 Mana mbaha kupamandika kubhukana
na kutenda umaha, handa Chapanga paka-
pala, ngati ng'obhe kumokola kimbamanda kub-
hukana na kutenda uhokelo.

18 Kiyaha Kilisito mwene kakimbamandika na
kakihwegha pa ughumo hela kwa kya ulemwa
ghwenu, mundu ywa umaha ywa nga uhokelo
ghwohele kakihwegha kwa kya bhanaulemwa,

ngati kabhayeghe kwa Chapanga. Mmili ghwake ghukikomwa peni kakitendekwa ulami mu nhuki,

¹⁹ na habhu kakighenda na kuyilandamiha mihuki yibheghite mukibhopo,

²⁰ abho ndo bhala bhaakaniti kunnyitikila Chapanga pala Chapanga kakialimbililiti manjubha gha Nuhu pakabheghite kangutendekeha lila lisafina. Bhaalopohitwe mu lisafina alyo, ndo bhandu bhamandina ghweka ndo bhandu anane,

²¹ machi agho ndo nhwano ghwa ubatiso ghweni hata mwenga nlopohwa. Chepa kughululwa kwa kubhuha liku lya mmili, ngati handa ninganilo lya Chapanga kwa njila uhyuko ghwa Yesu Kilisito,

²² ywene ywakaghendite kunani kwa Chapanga na hinu katama mbande ya nnilo ghwa Chapanga, na andumitumi bha kunane kwa Chapanga, bhana makakala na akulu bhanautabhala babhegha pahi ya ywombe.

4

Kutama kwa kya Chapanga

¹ Kya habhu, kiyaha Kilisito kakipamandika mu mmili, na mwenga mmeghe kala kubhegha na hwacho handa yaki, mana handa mpamandikiti mu mmili nnekana na ulemwa.

² Kya habhu, ubhumi ghwake ghungunoghwa kulongohwa handa pakapala Chapanga, hangi chepa tama hakataho.

³ Mana ndaluko ghwa ubhumi ghweni ghwa makachu ghubaka kwa kutenda milando yaayi-pala bhandu bha nga Chapanga. Mukitama

ulami ghwa utyahe, tama hakataho, ulobhi ghwa kupitingana, njeketule ya utyahe na matundamilo gha mang'omong'omo ndo mayaghabhiho.

⁴ Na hinu bhandu abho bhanga kummanya Chapanga bhangukangacha paabhona kukita mwenga mungulilunga ng'obhe nabho kangi mu kutenda mihakataho mikulu, kya habhu bhangubhaligha,

⁵ peni yabhanogha kuyanga kwa kya nnando aghwo muulongolo ghwake ywombe, ywakabheghite kala kuatosa bhanaubhumi na bhaahweghite.

⁶ Kubhukana na habhu Nhalo ghwa maha ghwa Yesu Kilisito ghukilandamihwa ngati bhakitoswa mummili handa bhandu bhangi ngati bhatame handa pakapala Chapanga.

Ayimilila bha maha bha kipala kya Chapanga

⁷ Hino, uhiko ghwa milando yoha uheghelela. Kya habhu yingubhanogha kulilongoha bhene na kukilukiha ngati nhotole kutundamila.

⁸ Kikulu kya kughungila npalani kwa mwoyo ghwoha, mana upalo ghunguhwikila ulemwa ntangalo.

⁹ Mmeghe na utekulo mabhene kwa mabhene kya nga kuhyononeka.

¹⁰ Kila yumo, yingunnogha kakitumile maha kipala kyake kyakakabheghite nakyo kuatagatila ayake handa nnyimilila ghwa maha ghwa kipalanhanganganiko kya Chapanga.

¹¹ Ywakalandamiha malagho, kangunoghwa kulongela handa mundu ywakalongelagha

malagho gha mwene Chapanga, yunakundumikila kangunoghwa kundumikila kwa makakala ghakakamuhitwe na Chapanga, ngati Chapanga kamokole kukwihwa mumilando yoha kwa njila ya Yesu Kilisito, yweni ukwiho na ukulu ghuna ywombe manjubha na manjubha ghoha. Mwika.

Kupamandika kwa kya Kilisito

¹² Maaghanja nkotoke kukangacha kubhukana na mang'eho mabhabho ghaantulukila handa kukita kinguntulukila kilibhi kya kihenja,

¹³ ngati nnyelevelwe kukita mungulilunga mu himbamanda kya Kilisito, ngati mmokole kubhegha na uyelelo ngenju paukulu ghwake paupala kuhwimulighwa.

¹⁴ Mbaha yenu handa panlighwa kwa kya lihina lya Kilisito, kiyaha Nhuki ghwa ukulu ghwa Chapanga, ywene Nhuki ghwa Chapanga kangutama unani mwenu.

¹⁵ Peni kakotoke kubhegha mundu ywohele mumwenga kangupamandwa kubhukana yunakukoma, mwihi, nhokelo ebu mundu yunakukokela bhulwa.

¹⁶ Peni handa mundu kangupamandika kiyaha ndo yunakunhyubhalila Kilisito, kakotoke kubhona honi, ngati kantike Chapanga kiyaha kakemwa kwa lihina alyo lya Kilisito.

¹⁷ Kiyaha ndadaluko ghwa toso ghuhika, na toso ayo yinguyanda na bhandu bhake mwene Chapanga, payibhele toso ayi yinguyanda kwa twabhene twenga, kuuhiko ghwake yabhegha bhuli? Kwa bhala bhanga kuhyubhalila Nhalo ghwa Maha ghwa Chapanga?

18 Na bhulabhula m,
“Handa payibhegha unonopo kwa bhaabheghite
na shaliya kulopoka,
Yaabhegha bhuli kwa bhala bhanga kuntun-
damila Chapanga na bhanaulemwa?”
19 Kya habhu, bhala bhaapamandika kubhukana
na upalo ghwa Chapanga, kwa mandendelo
ghabhe gha maha, yingubhanogha bhalikamuhe
kwa mmumba ghwabhe ywene yunakuhyubha-
lika, na bhaghendelele kutenda gha maha.

5

Ngwemuko ya bhandu bha Chapanga

1 Hinu nungulongela na aghohi ayangu bha
ngwemuko ya bhandu bhaanhyubhalila Kil-
isito, nenga nuubheghite nnyimiho ghwa kim-
bamanda kya Kilisito na kulilunga na ukulu
ghuupalakuhwimulighwa, nunguasigha mwenga
kukita,

2 mulihakile ngwemuko lya Chapanga limulika-
muhitwe, muliyimilile kya nga kingakamiho, na
kwa kubhegha kala handa pakapala Chapanga
nkotoke kutenda lihengo lyenu kwa tama ya
mbiya ngati mulibhuhe kwa mwoyo ghwoha.

3 Nkotoke kulitenda angwana kwa bhala
bhamubhatabhala, ngati mmeghe nhwano kwa
ngwemuko alyo.

4 Na Nhakila Nkulu pakahwimulighwa,
mwenga makingama kilemba kya ukulu ghwa
nga kumbughala.

⁵ Ubhwabhuabhu na mwenga maahongolo yingubhanogha kubhayitikila aghohi bhenu. Mab-hoha mwenga yingubhanogha kubhegha na utekulo ngati mmokole kundumikilana, kiyaha matyeko gha Chapanga ghangulongela, “Chapanga kabhapingikikagha bhaabheghite na mad-umbo, peni kanguapegha umaha bhanautekulo.”

⁶ Habhu hinu, mulitekulile pahi ya kibhoko kihwadali kya Chapanga, ngati kabhakwehe kwa ndaluko ghwake.

⁷ Muntwike maghayo ghenu ghoha, kiyaha ywombe kanguaghayighayila munu milando yenu.

⁸ Mulibhike kala, nkilukihe! Kiyaha nmyanja ghweni, ywene ndo Nchipila, kangutindi-latindila handa lihimba ywakalundumagha pakipalaha mundu kammapule mapule.

⁹ Mmeghe ngungulima mu kuhyubhalila na kunpingikiha, kiyaha mungumanya kukita alongo bhenu kwohele pannima bhangumokola kimbamanda handa mwenga.

¹⁰ Mwenga pampamandika kala kwa ndaluko ghwa mandina, Chapanga ywa umaha ghwoha na ywene kanguakema kulilunga mu ukulu ghwake ghwa manjubha ghoha nkati ya Kilisito. Ywombe katabhatenda uhyono, kubhatangatila makakala na kuayimiha ngungulima nkotoke ku-loghoya.

¹¹ Makakala ghabhegha na ywombe manjubha ghoha! Mwika.

Ujambuho ghwa kuuhiko

¹² Nibhatyekela lihamba ali lihupitaho kwa utangwo ghwa Saluvanusi, nungummalangila kukita ndo nnongo ghwa kunhyubhalika nungupala kuayonjokeha mwoyo na kuayimiha kukita ayi ndo hoto ya umaha, nnyime kwa ungungulima mu umaha aghwo.

¹³ Ngwemuko ya bhandu bhaanhyubhalila Kilisito bha kitami kya Babeli bhene bhaalinitwe na Chapanga bhanguajambua, kangi na mwana ghwangu mu kunhyubhalila Kilisito ywakakemwa Maliki, kanguajambua.

¹⁴ Mulijambuhe mabhene kwa mabhene kwa upalo ghwa hoto.

Uhihimilo ghubheghe na mwenga mabhoha mummeghite mu Kilisito.

Ndwewe Bible Version
The New Testament in the Ndwewe language of
Tanzania: Ndwewe Bible version

copyright © 2025 The Word for the World International

Language: English

Contributor: The Word for the World Southern Africa

The New Testament in the Ndwewe Language.

<https://www.twftw.org/>

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-08

PDF generated using Haiola and XeLaTeX on 8 Jul 2025 from source files dated 8 Jul 2025

6714417a-c093-5d0c-b3e0-f476486e8051